


T 3159/5932.82

15



直隸秦州新志卷之十二下

哈佛大學漢和
圖書館珍藏印

雜記

叢談

宋

武帝永初元年乞伏熾槃進號安西大將軍

文帝元嘉二年十一月癸酉以前將軍楊玄爲征西

將軍北秦州刺史

元嘉七年六月己卯以冠軍將軍氐楊難當爲秦州

刺史九年加號征西將軍

元嘉九年六月乙未以征西將軍吐谷渾慕容瓚爲
西秦河二州刺史隴西王

十五年二月丁未以平東將軍吐谷渾慕容延爲鎮
西將軍秦河二州刺史明年改封河南王

二十年七月癸丑以楊文德爲征西將軍北秦州刺
史封武都王

三十年六月辛酉安西將軍西秦河二州刺史吐谷
渾拾寅進號鎮西大將軍

孝武帝孝建二年三月壬子以行征西將軍楊文智

爲征西將軍北秦州刺史

明帝泰始二年秋七月丁酉以仇池太守楊僧嗣爲

北秦州刺史武都王明年進號征西將軍

後廢帝元徽四年五月以寧朔將軍武都王楊文慶
爲北秦州刺史後進號征西將軍

順帝昇明二年六月丁酉以輔國將軍楊文宏爲北
秦州刺史

初武帝定關中將還三秦父老詣門流涕訖曰殘民
不沾王化於今百年始覩衣冠方仰聖澤長安十陵

是公家墳墓咸陽宮殿數千間是公家屋宅捨此欲何之帝爲之愍然慰譬曰受命朝廷不得擅留感諸君念本之意今留第二兒令鎮此境乃以次子義正都督雍涼秦諸軍事委以關中之任尋又進督并東秦二州領東秦州刺史時隴上流人多在關中望因大威復得歸本反置東秦州父老知無復經畧隴右固關中之意咸感歎息

王智從征長安留爲桂陽公義正安西將軍司馬天水太守

劉道產爲梁南秦二州刺史有惠化關中流民前後出漢川歸之者甚多元嘉六年道產表置隴西宗康二郡以領之

薛安都初仕拓跋氏助其秦州刺史北賀汨擊反羌曰龍子滅之由是爲僞雍秦二州都統州各有刺史都總統其事

仇池之平也以胡崇之爲龍驤將軍北秦州刺史尋爲虜所執

拓跋濬有散騎常侍鎮西將軍清水公拾遺敕文

賈息會稽人少有志行為鄉曲所推重元嘉三年母
亡居喪過禮未葬為隣火所逼息及妻栢氏號哭奔
救隣近赴助棺櫬得免恩及栢俱見燒死有司奏改
其里為孝義里蠲租布三世追贈天水部顯親縣左

尉按其人無與此地而其贈則用此官亦佳事也故錄

元嘉中大且渠蒙遜卒文帝以其子茂虔都督秦河

沙涼四州諸軍事涼州刺史河西王茂虔弟儀德為

征東將軍秦州刺史按此秦州乃假號也宋未嘗得

宋之世若宗室名臣都督雍涼南北秦四州居州諸軍事者其北秦皆假號也今俱弗載

齊

高帝父蕭承之在宋朝為梁州橫野府司馬漢中太

守從蕭思話討氐帥楊難當有功

宋元嘉二十九年高帝領偏將軍征仇池破武興蘭

臯二壘

建元二年冬十一月戊子以氐楊後起為秦州刺史

三年冬十月戊子以吐谷潭度易侯為西秦河二州

刺史河南王

武帝永明八年八月乙酉以行河南王世子休畱成

爲秦河二州刺史

明帝建武二年秋七月辛卯以氏楊馥之爲北秦州刺史

四年冬十一月丙辰以氏楊靈珍爲北秦州刺史

焦度字文續南安氏人祖文珪避難至襄陽宋元嘉

中僑立天水郡略陽縣乃屬焉以軍功卒贈梁秦二

州刺史

觀此則南朝所謂秦州天水略陽者槩可知矣

武帝永明四年造戶籍分置州郡雍州涼州秦州等

二十五州在河南湘州懷州秦州東雍州等十三州

在河北凡分魏晉舊司豫青兖冀并幽秦雍涼十州

地及宋所失淮北爲三十八州矣

梁

武帝天監元年六月庚戌以行北秦州刺史楊紹先

爲北秦州刺史武都王

天監三年九月壬子以河南王世子伏連籌爲西秦

河二州刺史河南王

中大通元年三月丙辰以河南王阿羅正爲西秦河

沙三州刺史

中大通二年夏四月壬申以河南王佛輔為西秦河
二州刺史

六年三月己亥以行河南王可沓振為西秦河二州
刺史河南王

八月己未以南梁州刺史武興王楊紹先為秦南秦
二州刺史

敬帝紹泰元年鎮北將軍譙秦二州刺史徐嗣徽進
號征北大將軍按此秦與譙相近也

曹景宗新野人刺史蕭赤斧板為冠軍中兵參軍領

天水太守梁書無州郡志考齊書雍州有新野郡有南天水郡亦有畧陽西縣皆僞置也然則

蕭赤斧乃雍州刺史也錄此者為北秦州証也

張纘字伯緒太清中都督雍涼北秦東益郢州之竟

陵司州之隨郡諸軍事按江左命官都督雍涼者多帶竟陵等處則以雍州原寄

襄陽故也乃其地亦有北秦畝

羊侃於魏正光中為偏將隸蕭寶寅討秦州羌莫遮

念生念生遣其弟天生寇雍州侃潛身巡塹伺射天

生應弦而倒其眾遂潰侃後歸順以功名終

杜懷寶杜陵人其先自北歸南居於雍州之襄陽遂

家焉大同初懷寶為梁州刺史值魏梁州刺史元羅
 舉州內附懷寶復進督華州時秦州所部武興氏王
 楊紹反懷寶擊破之五年卒於鎮第七子崩別見
 太清中以徐文盛督涼南秦沙東益巴比巴六州諸
 軍事仁威將軍秦州刺史授以東討之任於是文盛
 督衆軍東下至武昌

陰子春字幼文父智伯官至梁秦二州刺史普通中
 子春累遷至南梁州刺史又遷都督梁秦華三州諸
 軍事梁秦二州刺史

簡文帝大寶三年五月魏遣太史潘洛辛等寇秦郡
 王僧辯遣杜翦帥衆拒之

承聖三年春正月秦州刺史嚴超達自秦郡圍涇州
 侯瑱張彪出石梁為其聲援六月魏遣將步六汗薩

率衆救涇州按此則秦郡似與涇州相近然究不知其在何所也

齊將郭元建攻秦州刺史嚴超遠於秦郡王僧辯令
 杜翦赴援陳霸先自歐陽來會與元建大戰於士林
 崩因縱兵擊大破之

陳

武帝在梁紹泰初為侍中大都督中外諸軍事表自東討至義興秦州刺史徐嗣徽據其城帝於治城寺立柵十一月甲辰嗣徽等攻治城柵帝領精兵出西明門襲擊之嗣徽留人守城自往南州采石以迎齊援十二月癸丑帝遣侯安都領舟師襲嗣徽家口於秦州官軍連艦塞淮口斷賊水路

宣帝大建五年三月己丑北討大都督吳明徹發自白下四月辛亥克秦州水柵辛酉齊軍救秦州明徹又破之五月戊子又克譙郡城秦州城降觀此數條則南朝之

所謂秦州可知矣事宜附在兵戎然非真此地之兵戎也故入雜記

元魏紀年之說已見兵戎自茲以後地為其所有事較多故加嚴非專秦州者不錄

太平正君六年秦州刺史周鹿觀率眾討汾曲盜薛永宗不克而還

普泰元年以車騎大將軍滑州刺史侯莫陳悅為儀同三司秦州刺史

文成皇后馮氏長樂信都人父朗秦雍二州刺史坐事誅后遂入宮

孝文帝欲都洛詔羣官前秦州刺史呂受恩等仍守

愚固帝皆撫而答之詞屈而退

河間公齊與揚保宗對鎮駱谷保宗欲閉險自固秦州主簿邊因知之密告齊齊晨詣保宗呼曰古弼至欲宣詔保宗出齊叱左右扶保宗上馬馳驛送臺元崙以功除統萬鎮將從永昌王仁南征別出汝陰濟淮宋將劉康祖屯於慰武亭以邀軍路師人患之崙曰今大風旣勁若令推草車方軌並進乘風縱烟火以精兵自後乘之破之必矣從之斬康祖傳首行宮詔除秦州刺史封隴西公

陽豐公庫汗明於斷決每奉使察行州鎮折獄以情所歷皆稱之秦州父老詣闕乞庫汗爲刺史者前後千餘人朝廷許之未及遣而卒

元譚頗強立少爲宗室所推敬出爲高陽太守爲政嚴斷豪右畏之除安西將軍秦州刺史

杜祖悅京兆人頗有識尚稍遷天水仇池二郡太守羅衡代人也羅結之後累遷天水太守

古弼代人也宋將裴方明等擊楊難當難當遣使請救兵未至難當奔上邽方明克仇池立揚元虔子保

熾於是假弼節督隴右諸軍宋遣其秦州刺史胡崇之屯仇池弼與元齊邀崇之於濁水擒之弼復與東道將皮豹子等討仇池仇池平未幾諸氏復推楊文德爲主圍仇池弼發上邽等諸軍討之仇池圍解豹子屯下辯欲還弼止之世祖嘉焉此一人將畧故不入兵戎王斤鎮長安驕矜不順法度信用左右調役百姓民不堪之南奔漢川者數千家而委罪於秦州刺史任延明等世祖召二人問狀知爲斤所誣遣人復按虛實得數十事遂斬斤以徇

周觀代人也驍勇有膂力每在軍陳必應募先登以功進爵金城公除秦州刺史撫馭失和民薛永宗聚衆於汾曲以叛觀討永宗爲流矢所中世祖幸蒲坂觀聞帝至驚怖而起瘡重遂卒按前帝紀有周鹿觀討薛永宗不克殆卽此人也然觀其賊在汾曲而駕臨蒲坂則是蒲坂之秦州可知

陸正代人也父洛侯秦州刺史真少善騎射以膂力過人數從征伐以功至大官封侯

陸定國代人龐之子襲父平原王爵恃恩不修法度坐事免官爵爲兵太和初復除侍中鎮南將軍秦益

二州刺史復王爵八年薨於州

王疑北海劇人以父任爲中書學生稍遷南部大夫至南部尚書在任十四年時南州多事文奏盈几訟者填門疑性懦緩委隨不斷終日在坐昏睡而已時人爲之語曰實癡實昏終得保存進爵樂安公出爲鎮西將軍秦州刺史改爲華山公

秦州呂苟兒反李煥爲平西將軍督兵進討煥遣別將石長樂等由麥積崖赴援屬都督元麗至遂共平之

薛謹字法順河東汾陰人與其父辯同歸國授河東太守襲爵汾陰侯世祖尅蒲坂以新舊之民分爲一郡謹仍爲太守遷秦州刺史將軍如故進安西將軍涪陵公刺史如故謹自郡遷州威惠兼備風化大行時兵荒之後儒雅道息謹命立庠教以詩書三農之暇悉令受業躬巡邑里親加考試於是河汾之地儒

道興焉

前於名宦志已註明茲復備錄以証

謹孫允爲都將討秦州反賊支酉生擒斬之

薛世遵代人薛虎子之子景明中爲秦州刺史

韋道福杜陵人父巽仕宋爲秦州刺史

說見官師

皮豹子漁陽人爲仇池鎮將興安二年宋遣其將蕭道成王虬馬光等入漢中別令楊文德楊頭等率諸氏羌圍武都豹子遣人於祁山取馬欲往赴援文德謂豹子欲斷其糧運據險自固豹子上表乞師請遣秦州之民送軍祁山詔益之兵宋將乃退復遣其將殷孝祖修兩當城於清東以逼南境封敕文擊之不克詔豹子助擊之宋遣步卒五千助戎兩當去城八里與豹子前鋒候騎相遇卽便交戰豹子軍繼至縱

騎追擊大破之至於城下其免者千餘人而已

皮喜豹子子亦爲仇池鎮將申恩布惠夷民大悅歸附者甚衆於是置廣業固道二郡以居之太和元年劉宋葭蘆戍主楊文度竊據仇池詔喜討之遣平西將軍楊靈珍擊文廣所置仇池太守楊真真衆潰僅而得免喜遂軍於覆津文度遣將守津道懸崖險絕偏閣單行喜兵攀崖涉水衝擊其將追奔西入攻葭蘆城拔之斬文度傳首京師

游曇護太和中爲典寺令慰勞仇池爲賊所害

直隸秦州新志 卷之三
高欽字希叔漁陽雍奴人頗有文學莫折念生之反也欽隨元志西討志敗爲賊所擒念生以爲黃門郎死於秦州

崔遊字延叔博陵安平人中山王英引爲司馬英敗遊坐徙秦州久而得還後除南秦州刺史爲亂人韓祖香等所執害

薛安都寇宏農執太守李拔等遂逼陝城時秦州刺史杜追生討安都仍執拔等南遁及世祖臨江拔乃

得還按此秦州似非此地

薛道標安都之子太和間以鎮南將軍爲秦州刺史十三年卒子達爲漢陽太守不樂爲郡詔聽解卒道次安都少子爲安西將軍秦州刺史假河南公子巒別見

宋弁廣平人次子紀爲秦州大羌令

李崇頓邱人當楊靈珍襲破武興詔崇督隴右諸軍討之崇槎山分道進據赤土靈珍遣弟屯龍門躬率精勇據鷲峽崇遣將從他路夜襲龍門破之乃自攻靈珍多設疑兵襲尅武興靈珍遠遁

傅永除太中大夫行秦梁二州事代邢巒鎮漢中
裴芬之爲岐州刺史正光末元志西討隴賊軍敗退
守岐州爲賊所圍城陷志與芬之並爲賊擒送於上
邽爲莫折念生所害

李忻榮漢中人以戰歿封其子建爲清水縣開國子
食邑二百戶

余朱天光討平秦賊元曠以之爲隴西王

盧同范陽人延昌中秦州民反詔同兼通直常侍持
節慰諭之多所降下

常景字永昌河內人也父文通天水太守

張普惠爲光祿大夫時仇池武興羣氏數反西番郡
戍租運久絕詔普惠爲西道行臺給秦岐涇華雍幽

東秦七州兵武三萬人任其召發送南秦東益二州

兵租分付諸戍普惠至南秦停涇岐華雍幽東秦六
州兵武召秦州兵武四千人分配四統令送租兵連

營接柵相繼而進秦

闕字

所縮武都武階租頗得達東

益羣羌先款順故廣業仇鳩河池三城粟便得入

賀拔岳以功封清水郡公都督三雍三秦二岐二華

諸軍事後又進督四梁二益等二十州諸軍事

侯莫陳悅代郡人父婆羅門爲馳牛都尉故悅長於河西好田獵便騎射積軍功進爵爲公普泰中除儀同三司秦州刺史永熙初加開府都督隴右諸軍事仍秦州刺史賀拔岳召悅共討靈州悅誘殺岳岳之所部聚於平涼夏州刺史宇文黑獺總岳部衆入隴征悅悅棄城南據山水之險召南秦州刺史李景和景和密降黑獺勒其所部使上驢駝云儀同有教欲還秦州復給悅帳下云儀同欲還秦州汝等何不辦

裝入情惶惑皆散走而趨秦州景和先至據城以慰輯說部衆離散猜畏旁人不聽左右近已與其二弟并兒及謀殺岳者八九人棄軍逃走數日之中盤回往來不知所趨乃於中山令從者悉步自乘一騾欲向靈州中路追騎將及遂縊死野中弟息部下悉見擒殺悅自殺岳後神情恍惚不復如常恒言我僅睡卽夢見岳語我兄欲何處去隨我不相置因此彌不自安而致敗滅

馮熙字晉昌長樂信都人文明太后之兄也父明官

至秦雍二州刺史遼西郡公坐事誅

李惠長於思察雍州廳事有燕爭巢鬪已累日惠令

人掩獲以弱竹彈兩燕既而一去一留惠笑謂吏屬

曰此留者自計為巢功重彼去者既經楚痛理無留

心羣下服其聰察人有負鹽負薪者同釋重擔息於

樹陰二人將行爭一羊皮各言藉背之物惠遣爭者

出令人置羊皮席上以杖擊之見少鹽屑曰得其實

矣使爭者視之負薪者乃伏而就罪凡所察究多如

此類由是吏民莫敢欺犯

惠先為秦州刺史其事不傳即此可見故錄之

太和八年始準古班百官之祿以品第各有差先是

天下戶以九品混通戶調帛二匹絮二斤絲一斤粟

二十石至是戶增帛三匹粟二石九斗以為官司之

祿所調各隨其土所出其雍華秦洛等十九州貢綿

絹及絲岐涇秦安營幽等及光郢東秦司州等秦州

河東之蒲坂汾陰縣等數十州郡皆以麻布充稅

則當時有秦州有蒲坂之秦州有東秦有貢綿絹之秦州可見

天平三年秋并肆汾建晉秦陝東雍南汾九州霜旱

民饑流散四年春開倉賑恤而死者甚衆時諸州調

絹不依舊式齊獻武王以其害民請班海內悉以四十尺為度天下利焉

此秦州近汾陝

熙平中禁妖言犯者輒死延陵有月光童子劉景暉者甫九歲人謂其能變為蛇雉有司以其愚小請依凡律靈太后令曰可謫畧陽民

正光時莫折念生之亂前河州刺史息景進引念生

攻河州為行河州高徽所敗景進等皆退奔秦州

按前所稱齊獻武王即北齊神武帝高歡也先是其年春神武令阿至羅逼西魏秦州刺史建忠王万俟普撥降之次年春神武以九州霜旱請所在開倉賑給見北齊帝紀

北齊

段榮字子茂姑臧人少好星象之學正光初語人曰不及十年當有亂或問起於何處當可避乎榮曰亂源始此無所避也未幾果然天平三年轉行秦州事榮性溫和所歷皆推仁恕民吏愛之

乞伏令和與兄貴和武平末並開府儀同三司相繼投周令和授柱國隨大業初卒於秦州總管

薛循義河東人祖仁壽秦州刺史汾陰公

當是薛謹之後

可朱渾元遼東人從余朱天光以功為渭州刺史侯

莫陳悅走元收其衆入據秦州爲周攻圍苦戰結盟而罷

皇甫和朝那人其先因官寓居漢中祖澄南齊秦梁二州刺史父徽字子元梁安定略陽二郡太守

源彪字文宗西平樂都人天統初秦州刺史宋嵩卒

朝廷以州在邊陲以文宗往蒞涇州頗著聲績除秦

州刺史乘傳之府特給後部鼓吹按文義應是此秦州然彪本傳接云

李孝貞聘陳陳主謂之曰齊朝還遣源涇州來瓜步可謂通和矣及吳明徹寇江南趙彥深謂文宗曰第

往在涇州甚悉江淮間事云云則此涇秦皆南土也前已辨之

周

太祖宇文氏諱泰字黑獺在魏永熙時爲夏州刺史

秦州刺史侯莫陳悅旣害賀拔岳魏帝詔太祖史氏舊文

統領岳衆太祖與悅書責之悅懼太祖謀已乃詐爲

詔書與秦州刺史万俟普撥令與悅爲黨援普撥疑

之封詔以呈太祖太祖表之並請討悅万俟普撥又

遣其將叱干保洛領二千騎來從軍太祖引兵上隴

悅衆離散退保畧陽太祖卽率輕騎趣畧陽或勸悅

退保上邽以避之時南秦州刺史李弼請爲內應悅

軍驚潰太祖遣兄子導追悅至牽屯山斬之太祖入上邽收悅府庫財物山積皆以賞士卒毫釐無所取左右竊一銀鏤甕以歸太祖知而罪之卽剖賜將士衆大悅太祖乃令衛將軍趙貴行秦州事齊神武聞秦隴克捷乃遣使來深相依結太祖拒而不納太祖之討悅也悅遣使請援於齊神武神武使其都督韓軌將兵一萬據蒲坂而未得入關魏帝進太祖關丙大都督畧陽縣公承制封拜於是以李弼爲秦州刺史前畧陽郡守張獻爲南岐州刺史

時魏帝方圖齊神武又遣徵兵太祖乃令前秦州刺史駱超爲大都督率輕騎一千赴洛

魏大統二年秦州刺史建忠王万俟普撥率所部叛入東魏太祖追之至河北千餘里不及而還

明帝武成元年以柱國蜀國公尉遲迴爲秦州總管武帝保定二年以大將軍蔡國公廣爲秦州總管

五年秋七月庚寅行幸秦州降死罪以下

天和三年以柱國陳國公純爲秦州總管

六年以大將軍杞國公亮爲秦州總管

建德三年以大宗伯周昌公侯莫陳瓊爲秦州總管
太祖誅侯莫陳悅遣侯莫陳崇慰撫秦州

若干惠代郡人拜秦州刺史未及之部遷司空

劉昶中山人大象中位至柱國秦靈二州總管弟靖

天水郡守

蕪湛字景儁武功人志行早著與兄亮並有名於時
蕭寶寅西討以湛爲行臺郎中深見委任寶寅將謀
叛逆令湛從母弟天水姜儉謂湛曰吾不能坐受死
亡今便爲身計不復作魏臣也與卿生死榮辱方當

共之故以相報湛聞之舉聲大哭儉遽止之曰何得
便爾湛曰闔門百口卽時屠滅云何不哭哭數十聲
徐謂儉曰爲我白齊王王本以窮而歸人賴朝廷假
王羽翼遂得榮寵至此旣屬國步多虞不能竭誠報
德豈可乘人閒隙便有問鼎之心乎寶寅復令儉謂
湛曰此是救命之計不得不爾湛復不從寶寅素重
之乃聽還武功寶寅後果敗

薛明汾陰人大象末儀同大將軍清水郡守

楊荐秦郡寧夷人進爵清水縣子

韋瑱杜陵人祖千雄魏畧陽郡守

初太祖與魏太子西巡于提之孫實時從太祖刻石

於隴山之上錄功臣位以次鐫勒預以實為儀同

太祖常賜諸子馬齊王憲獨取駿馬曰色類既殊或

多駿逸太祖喜後從獵隴上經官馬牧太祖每見駿

馬輒曰此我兒馬也命取賜之

隋

高祖文皇帝初仕周年十五封成紀縣公

文帝既滅陳配其宗室於隴右

開皇二年以大將軍竇榮定為秦州總管

三年冬以秦王俊為秦州總管

煬帝大業五年四月西巡至天水大獵於隴西

七年夏煬帝避暑隴川宮

後齊文襄嗣位猶為魏臣置王高祖秦州使君以下

至獻武王凡四廟

見隋書禮儀志

齊武成中祀高祖秦州刺史等並奏始基之樂

音樂志

楊處綱高祖族父也性質直在官疆濟為當時所稱

刺蒲州吏民悅之遷秦州總管卒官謚曰恭

吐谷渾主呂夸在位百年屢廢太子其太子謀欲執呂夸以降請兵於邊吏秦州總管河間王宏請將兵應之文帝不許

楊尚希宏農人祖直魏天水太守

辛彥之狄道人博涉經史與天金牛宏同志好學

梁彥光安定人祖茂魏秦華二州刺史

齊王楊暕信任小人庫狄仲錡陳智偉二人詣隴西檟炙諸胡責其名馬

宇文述貪鄙隴右諸胡子弟述皆接以恩義呼之爲兒由是競加餽遺

煬帝大業中以楊元感初平令裴矩安集隴右

大業中貶博士褚亮西海主簿潘徽威定主簿俱至隴山而徵死亮爲歛瘞人皆義之

唐

太宗皇帝當隋義寧元年爲秦國公時擊敗薛舉兵遂畧地至隴右

貞觀四年十月甲辰帝獵於魚龍川

武后時御史郭翰巡察隴右多所按劾薦狄仁傑

睿宗時太平公主豪富隴右牧馬至萬匹

先光元年十一月明皇巡邊西自河隴而東

開元初吐番寇邊詔常侍解琬與虜定經界琬言吐番不可以信約請調兵十萬屯秦渭間是冬虜果入寇

天寶中蘇毗王沒陵贊欲舉國內附為吐番所殺子

悉諾率首領奔隴右

天寶十五載六月甲午詔親征丙午次河池郡

明皇西幸經河池斜谷左拾遺高適追及帝於河池

隴西郡公瑀從帝幸蜀至河池封漢中王

車駕至河池劔南節度副使崔圓馳奏蜀土腴穀羨

儲供易辦帝歎其忠即日拜中書侍郎同平章事

七月丁卯皇太子為天下兵馬元帥御史中丞裴冕

隴西郡司馬劉秩副之

先是開元末命榮王琬巡按隴右至是以豐王珙為

隴右等處節度使以隴西太守鄧景山為副珙不行

咸通四年二月拜秦州經畧使高駢為南安經畧招

討使

正嘉泰州新志 卷之三
德宗時宰相賈耽嗜書尤悉地理時隴右陷於吐番
異時州縣遠近有司不復傳耽乃繪布隴右圖上之
詔賜幣馬珍器

建中四年朱泚反始泚去鎮留兵五百戍隴上以部
將牛雲光督之至是雲光謀請韋臯爲帥將劫以臣
泚臯用計悉誅之

貞元初吐番尚結贊欲間李晟大興兵踰隴無所掠
曰召吾來乃不牛酒犒軍徐引去

武宗時河南尹王質奏署幕府者若梁國劉蕡河東
裴夷直天水趙哲隴西李行方皆一時選云

中和二年僖宗幸蜀都統鄭畋與涇原程宗楚秦州
仇公遇鄜延李孝恭夏州拓拔思恭約盟傳檄天下
初天寶盜起中國用兵而河西隴右不守陷於吐番
至大中咸通始復隴右

陸贄爲相命吏部據內外員三分之計闕集人歲以
爲常是時河西隴右沒於虜河南河北不上計吏員
大率減天寶三之一

宗室世系表載先秦御史大夫李曇生子崇字伯

秦隴西守入漢有隴西太守伯考生尚成紀令因居成紀前涼張駿天水太守李弇高之祖也其別支在後周有秦河渭三州刺史貞又別房之後有成紀令朝其以隴西郡縣為封爵者不錄

李暉第八子翻其後有元魏河秦二州刺史權唐秦州刺史憬秦州叅軍叔綦後魏秦州刺史孝伯宰相世系表裴氏有後魏天水太郡秀業實氏有唐河池郡司馬明哲天水都督懷恪太原王氏有上邽尉向

張華之後有成紀丞思義

漢弓高侯韓頽當之後有東漢隴西太守尋

盧氏有秦州刺史秦卿

孫氏有東漢天水太守曼

天水姜氏有後周秦州刺史遠九真姜氏亦出天水

薛氏有隴西太守上童秦州都督純

韋氏有秦州都督師賁秦州刺史協字欽仁

唐氏有秦州刺史茂秦州守仲璨清水令元道上邽

令昱

鄭興之後有秦州司馬秦客

渾氏有秦州司馬正孫

天水權氏有兩當令頊

令孤氏有上邽令濬

高平徐氏有晉隴西內史暢字彥春

太宗貞觀中詔秦州都督紀王慎等所任州刺史并

功臣令世世襲會長孫無忌等固讓遂廢不行

馮益高州人本北燕馮宏之後留番禺爲本郡太守

王世矣益嘗與楊素論兵素竒之拜漢陽太守

裴伯先聞喜人炎之子歷秦州都督坐累且誅賴寧

相張說右之免官

王君奐爲隴右節度使吐番寇邊君奐率秦州都督

張景順乘冰度清海襲破之

乾元中岐隴賊郭誥等掠州縣崔光遠爲鳳翔尹喻

降之旣而沈欽不親事誥等陰約黨頊及奴刺突厥

敗秦州刺史韋倫於秦隴帝怒光遠無狀召還

廣德元年吐番敗隴右高適爲西川節度使率兵出

南鄙無功

直隸秦州新志 卷之三
建中二年吐蕃請盟德宗以崔漢衡爲和蕃使往來
要約遂定盟清水

李芄字茂初趙州人解褐上邽主簿嚴武爲京兆尹
薦補長安尉後至尚書右僕射

宣宗大中初續圖凌烟閣諸臣有太子太保同中書
門下三品宋國公蕭瑀 納言檢校并州大都督府

長史天平軍大總管隴右諸軍大使譙縣子婁師德
文昌左相同鳳閣鸞臺三品襲邢國公王及善

中書令河東縣侯張嘉貞 中書侍郎同中書門下

平章事清水縣公李元紘 度支尚書同中書門下

三品范陽郡公盧承慶 納言博昌縣男韋思謙

洛州都督右衛大將軍鄴國公竇軌 中書令漢陽

郡公張柬之 陝州刺史天水郡公邱行恭 冠軍

大將軍左羽林軍大將軍光祿卿天水縣公趙承恩

河西隴右副元帥兵部尚書同中書門下平章事

涼國公李抱玉 太原尹兼御史大夫北都留守河

東節度副大使南陽郡公鄧景山 以上諸人或會官
此地或地入銜封

不嫌
備錄

正統志卷之三十一
卷之三十一
七
清水之盟隴右節度使張鑑給尚結贊曰唐非牛不
田蕃非馬不戰請用犬豕羊結贊聽諾乃除地爲壇
刑牲壇北雜其血以進約唐地涇州右盡彈箏峽隴
州右極清水鳳州西盡同谷劔南盡西山大度水於
是升壇大亨獻酬乃還帝命宰相尚書與虜使者盟
長安而清水之約疆場不定復令崔漢衡決於贊普
乃克盟

長慶元年吐蕃聞回鶻和親犯清塞堡爲李文銳所
逐乃遣使來乞盟帝許之以大理卿劉元鼎爲盟會
使詔宰相與尚書僕射中丞卿尹將軍及吐蕃使者
論納羅盟京師西郊大臣豫盟者悉載名於策明年
請定疆候元鼎與論納羅就盟其國敕虜大臣亦列
名於策元鼎踰成紀武川抵河廣武梁故時城郭未
隳地皆秔稻桃李榆柳岑蔚戶皆唐人見使者麾蓋
夾道觀至龍支城耆老千人拜且泣問天子安否言
頃從軍沒於此今子孫未忍忘唐服朝廷尚念之乎
兵何日來言已皆嗚咽過石堡城右行數十里土石
皆赤虜曰赤嶺而信安王禕張守珪所定封石皆什

獨虜所立石猶存蓋隴右故地也

大中三年吐蕃恐熱保渭州求稱爲贊普奉歸唐宣宗命涇原靈武鳳翔邠寧振武等兵迎援恐熱既至倨夸自大且求河渭節度使帝不許還過咸陽橋歎曰我舉大事覲得濟此河與唐分境遂復趨落門川投散卒將寇邊會久雨糧絕奔還廓州於是鳳翔節度使李玘復清水邠寧節度使張欽緒復蕭關鳳翔收秦州是歲河隴高年千餘人見闕下天子爲之御延熹樓賜冠帶

五代

安叔千沙陀人唐明宗時拜秦州刺史更歷四鎮叔千狀貌唐唐而不通文字所爲鄙陋時人謂之沒字碑

晉開運間杜重威爲招討使李守貞爲都監攻下秦州殺二千餘人晉兵素驕而將無節制行營所至居民藜園一空至於草木皆盡

蜀王衍乾德二年冬北巡至於西縣旌旗戈甲連亘百餘里所在供億人不堪命

王衍九年以王承休爲天雄軍節度使天雄軍秦州也承休以宦者得幸妻嚴氏有絕色衍通之明年改元曰咸康以嚴氏故十月幸秦州行至綿谷而唐師入其境衍懼遽還

契丹滅晉漢高祖起於太原中國多故武雄軍節度使何建以秦成階三州附於孟昶昶攻下鳳州於是悉有王衍故地

周世宗伐蜀攻自秦州昶以韓繼勳爲雄武軍節度聞周師來伐歎曰繼勳豈足以當周兵耶客省使趙季札請行乃以季札爲秦州監軍使季札行至德陽聞周兵至遽馳還奏事昶召問之季札惶懼不能道一言昶怒殺之乃遣高彥儔李廷珪出堂倉以拒周師彥儔大敗走青泥於是秦成階鳳復入於周

歐陽公五代史死節傳贊其畧曰當世宗時王環爲蜀守秦州攻之久不下其後力屈而降世宗頗嗟其忠自古忠臣義士之難得也五代之亂三人者或出於軍卒或出於僞國之臣可勝歎哉可勝歎哉

三人謂王

彥章裴約劉仁贍也王環未嘗死節故別有傳

宋

開寶六年趙普遣親吏詣秦隴市屋材聯巨筏至京師治第吏因之竊貨大木冒稱普市貨鬻都下權三司使趙玘廉得之以聞

太平興國初秦州內附蕃部騷動命翰林司郭守文乘傳撫諭

太平興國八年五月詔長吏誘致關隴流亡

太宗時以國初諸方割據訟五代之制罪人率配隸西北邊多亡投塞外誘羌而寇乃詔當徒者勿復隸

秦州靈武通遠軍及緣邊諸郡

自唐末蕃戶有居渭南者溫仲舒知秦州驅之渭北立堡柵以限其往來太宗覽奏不懌因命寇準使渭北安撫族帳

淳化二年十二月賜秦州童子譚孺卿本科出身

景德三年九月秦州言野兒和尚族部落尤大能稟朝命凡諸族爲寇盜者輒遏絕之請加增三峇都首領

大中祥符四年帝祀汾陰秦州回鶻安密獻玉帶於

道左

大中祥符五年秦州遣指揮楊知進譯者郭敏送回鶻進奉使至甘州爲蕃所阻

大中祥符七年十一月詔給秦州七砦熟戶首領都軍主以下百四十六人告身

大中祥符九年知許州石普上言商賈自秦州來言唃廝囉欲陰報曹瑋請以臣所獻陣圖付瑋可使瑋必勝上以普言踰分除名

大中祥符九年唃廝囉立遵等數使人求內屬明道初卽授廝囉寧遠大將軍愛州團練使授逋哥歸化將軍

真宗初田錫出使秦隴還連上章言隴西苦靈夏之役生民重困上爲之戚然

真宗謂李廸曰曹瑋在秦州屢請益兵未及遣遠辭州事第怯耳誰可代瑋者廸對曰瑋知唃廝囉欲入寇且窺關中故請益兵爲備非怯也且瑋者謀畧諸將皆非其比何可代未久唃廝囉果犯邊秦州方出兵復召廸問曰瑋此舉勝乎對曰必勝居數日奏至

瑋與敵戰三都谷果大勝帝曰卿何以知瑋必勝迪曰吮旃囉兵遠來使謀者聲言以某日下秦州會食以激怒瑋瑋勒兵不動坐待敵至是以逸待勞也

仁宗時秦州與羌人爭古渭地仁宗問劉敞棄守孰便敞曰若新城可以蔽秦州長無羌人之虞傾國守焉可也或地形險利賊乘之以擾我邊鄙傾國爭焉可也今何所重輕規小利而使曲在中國議者多不同秦州自是多事

仁宗時隴安縣民誣平民五人爲劫盜尉悉執之一人掠死四人遂引服其家辯於州州不爲理悉論死未幾秦州捕得真盜隴州吏當坐法而會赦帝怒特貶知州孫濟爲雷州叅軍餘皆除名流嶺南賜錢粟五家復其役三年

嘉祐中于闐使者入朝過秦州留月餘壞傳舍什吞縱其徒入市掠餘食過鳳翔陳希亮乃治之

宋時大食入朝由沙州涉夏國抵秦州天聖後恐爲西人鈔畧乃詔取海路由廣州

古渭州距秦州三百里道經啞兒峽邊城數請城之

朝廷以饋餉之艱不許范祥權領州事驟請修築未報輒自興役蕃部驚擾青唐族羌攻破廣吳嶺堡圍啞兒峽砦官軍戰死者千餘祥生削一官

元豐四年西夏有李將軍清者本秦人說秉常以河南地歸宋其國母知之遂誅清而奪秉常政

神宗時令內侍李憲乘驛計議鳳翔邊事諸將皆聽節度中丞鄧閔甫御史周尹等極諫上弗聽

宋范鎮未仕時兄鎡卒於隴城無子鎮聞其有遺腹子在外徒步求之二年乃得之曰吾兄體有四乳是

兒必然已果然

元祐二年八月鬼章就擒檻送京師尋赦之授陪戎校尉遣赦秦州聽招其子以自贖

哲宗紹聖中去熙州鍾傳擅帥熙秦騎四萬出塞無功而還

徽宗時帝怒五路將帥劉仲武等十八人親書其姓名敕侍御史侯蒙往秦州逮治至秦仲武等囚服聽命蒙曰君輩皆侯伯無庸以獄吏辱第以實對因奏請赦之

大觀二年九月曲赦秦鳳永興軍路

宣和間金人犯京師宣贊舍人吳革請帝幸秦州
建炎三年張浚入討苗傅傅以堂帖趣浚赴秦州
建炎五年張浚敗於富平王庶勸浚收熙河秦鳳之
兵據關隴以爲後圖浚不納

紹興三年十一月宣撫司分陝西之地自秦鳳至洋
河以利州制置使吳玠主之屯仙人關

紹興五年金蒲察胡蓋擊關師古於臨洮衆三萬餘
從攻涇州從破德順秦鞏臨洮河蘭等州破吳璘兵
胡蓋皆有力焉

紹興間與金和金欲盡取階成岷鳳秦商六州分畫
地界使鄭剛中力爭不從又欲姑取商秦於大散關
立界剛中又不從

紹興中秦隴叛兵欲窺蜀宣撫使盧德原勤拊循嚴
守禦傳檄諸路人心以安

紹興九年李顯忠自延安南奔至河池縣見吳玠玠
曰忠義歸朝惟君第一

九月命秦鳳路招納蕃部熟戶及陷沒夏國軍民

紹興二十年金轉運使毛碩以鞏會德順道路多險
益引斤數太重請一引分作三四以從輕便朝廷皆
從之秦州倉粟陳積而百姓有支移者止就本州折
納其直公私便之

隆興元年史浩欲棄陝西朝臣有言西事者詔官軍
進討東不可過寶鷄北不可過德順且欲用忠義人
守新復州郡而官軍退守蜀口吳璘遂歸河池

隆興元年正月吳璘奉詔還河池金人乘其後亡軍
三萬餘遂陷新復十三州軍

孝宗時通判夔州陸游爲宣撫王炎陳進取之策謂
經畧中原必自長安始取長安必自隴右始

開禧二年韓侂胄欲用兵吳曦將西軍六萬駐河池
金人取成州曦乃焚河池還興州

開禧三年都統孫忠銳由鳳州攻大散關克之而遽
還鳳州關復陷宣撫參議楊巨源至鳳州執忠銳斬
之

吳曦反轉運使安丙時同居河池遂謀誅之

先是神宗初立詔慶渭秦延四州通判其選並從中

直隸秦州新志 卷之三 三
書母以恩例奏授

熙寧五年二月以呂公弼爲宣徽南院使判秦州
冬十月減秦鳳囚罪一等

七年閏四月以宣徽北院使張方平判永興分秦鳳

路兵爲四將

按此當入兵戎而命官則在雜記且雜記不拘先後可連而及之後做此

建中靖國元年汰秦鳳路二兵

紹興十一年七月詔優獎秦隴等州縣官到任半年
減磨勘任滿遷一官

嘉定十一年七月奪知天水軍黃炎孫三官辰州居

住

上年冬金兵迫湫池堡炎孫遁

王仁贍宋初授武德使知秦州後還朝廉得近臣戚
里遣人市竹木秦隴間聯巨筏至京師所過關渡矯
稱制免筭旣至厚結有司悉官市之倍收其直仁贍
密奏之太祖怒多所降罰

王顯字德明由樞密移知秦州初溫仲舒知州日開
拓山林諷蕃部獻其地後朝廷雖嘗給還而採伐如
故顯言乃者朝命以趙保吉修貢邊城務使安靜若
今動衆開斥疆境非便從之

直隸秦州新志 卷之三
郭載開封人知秦州兼沿邊都巡檢使先是巡邊者
多領兵騎以威戒人所至頗煩苦之載悉減去戎人
感悅

何中立除龍圖閣直學士知秦州言者以爲非治邊
才改慶州奏曰臣不堪於秦則不堪於慶矣願守汝
不報

呂夷簡參知政事事王曾謹甚曾力薦爲相及夷簡
位曾上任事久多所專決曾不能堪論議間有異同
遂求罷仁宗疑以問曾曰卿亦有所不足耶時外傳

知秦州王繼明納賂夷簡曾因及之帝以問夷簡曾
與夷簡交論帝前曾言亦有過者遂與夷簡俱罷
秦隴斜谷務造船材木率課取於民又七州出賦河
橋竹索恒數十萬包拯爲陝西轉運使皆奏罷之
胡宗回知秦州屬羌郎阿章叛宗回遣將王吉魏釗
討之皆敗死又促鈴轄种朴往亦死之坐奪職未幾
錄其堅守涅鄣之議復起知秦州

蔡若厚知秦州降羌在州者逸入京師訴事坐失察
削職

陸師閔知秦州諸道方進築被爵賞師閔在秦無所
 事怏怏不釋曾布議使督本部兵赴熙河共攻師閔
 承命踴躍集兵四萬以待而章惇陰諷熙帥鍾傅先
 出塞救師閔聽傅節制築淺井又築亂囉皆不成而
 還傅更檄會兵於鎮耳關未至復卻秦鳳之師再出
 再返勞且笑言者乞加責不聽召為戶部侍郎未及
 拜坐秦州詠增首虜事落職

金人既得秦州經畧使張深遣熙河副總管劉惟輔
 率兵禦之又檄隴右都護張巖往追之至鳳翔境上

巖與曲端期而不至徑前遇伏死之惟輔遁歸前於官師

志謂張深無考今於惟輔傳得之殆即此人耶蓋秦州經畧也

代淵字蘊之木代州人舉進士甲科為清水主簿歎
 曰祿不及親何所為耶還家教授舉鳳州團練推官
 不就著周易旨要老佛雜說數十篇

杜彥鈞景德中為天雄軍副都部署大中祥符五年
 復知莫州馬和節為潁川防禦使彥鈞換秦州

楊景宗以外戚得官授秦州刺史徙滑州性暴戾復
 使酒任氣所至為人患

紹聖中知秦州游師雄言于闐大食拂菻等國貢奉
般次踵至有司憚於供賚抑留邊方限二歲一進外
夷慕義萬里而至此非所以來遠人也從之自是訖
於宣和朝享不絕

金

大定二年徒單合喜定秦隴叅政石琚請曲赦秦隴
以定百姓從之

貞祐初烏古論克州置秦州權場宣撫副使完顏弼
以擅置移文問之克州曰近日入見許出外從宜行

事秦州自宋兵焚蕩權場幾一年矣今旣安帖復宜
開設彼此獲利歲收以十萬計對境天水軍移文來
請如俟報可實慮後時弼奏其事宰臣以克州雖擅
舉而無違失苟利於民專之亦可宣宗曰朕固嘗許
其從宜也

李文秀據秦州宣宗詔鳳翔軍討之軍圍秦州城時
愛申在軍中有罪當死宣宗問之樞帥有知其名者
奏此人將相材忠實可倚宣宗命馳赦之以爲德順
節度使行元帥府事

大定十一年右警巡使李寶以多支俸粟折錢杖謫
清水縣令

高衍爲吏部員外郎以擬選有私決杖降爲清水縣
主簿

傅慎微字幾先其先秦州沙溪人遷居長安宋末登
進士累官經制使兵敗入金爲禮部尚書修國史

蒲察婁室從元帥攻下西和州白撒由秦州進兵抵
棧道宋人來拒婁室乘高立幟策馬旋走揚塵爲疑
兵別遣精騎掩出其後宋兵大潰進丹州刺史

張中彥字才甫與秦鳳李彥琦攻宋將關師古下饒
風關代彥琦爲秦鳳經畧使秦州當要衝而城不可
守中彥徙治北山因險爲壘今秦州是也築臘家諸
城以扼蜀道帥秦凡十年

李獻可字仲和大定十年中進士第世宗喜曰太后
家有子孫舉進士甚盛事也累官戶部員外郎坐事
降清水令終山東提刑使衛紹王卽位以元舅故追
封道國公

元

至元二十一年秦州總管劉發有罪伏誅

仁宗時秦州山移御史馬祖常言山不動之物今而動焉由在野有當用不用之賢在官有當言不言之佞故致然爾疏聞大臣皆家居待罪

初金之亡也唯秦鞏二十餘州久未下耶律楚材奏曰往年吾民逃罪或萃於此故以死拒戰若許以不殺將不攻自下矣詔下諸城皆降

元初併京兆四川爲一道以廉希憲爲宣撫使劉太平等將爲亂時關中無兵備命汪惟良將秦鞏諸軍

進六盤惟良以未得上旨爲辭希憲卽解所佩虎符銀印授之曰此皆身承密旨但辦吾事已飛奏矣鞏昌帥府言鎮戎州有謀爲叛者連引四百餘人希獻詳推之惟誅首惡五人

王楸從征西夏及秦州夏人盡撤橋梁爲備軍阻不得前楸夜督士卒運木石北曉橋成軍乃得進

世祖出王秦中以姚樞爲勸農使教民畊植又思所以化秦人乃詔許衡爲京兆提學秦人新脫於兵聞衡來莫不喜郡縣皆建學校民大化之

明

洪武初明昇守將丁世貞失文州來圍秦州五十日兵敗夜宿梓潼廟其下殺之

成化時秦紘服闋復任秦州尋擢鞏昌知府十三年巡撫山西以奏宗藩罪爲王所誣逮治無驗而內官尚亨籍紘家以所得敝衣數事奏帝歎曰紘貧一至此耶賜鈔萬貫旌之

嘉靖間帝幸承天河南巡撫胡纘宗以事辱陽武令王聯聯素兇狡爲巡按陶欽夔劾罷以毆父論死父請出之復坐殺人不得解乃撫纘宗迎駕詩穆王八駿語爲謗詛言纘宗命已刊布不從屬欽夔論黜羅織成大辟候長至日令其子詐爲常朝官闌入闕門訟寃凡所不說悉構入之帝大怒立遣官捕纘宗等下獄法司盡得其誣罔仍坐聯父子碎然帝怒猶甚乃革纘宗職並除法司名承問者皆下詔獄焉

萬歷中廷推閣臣用於慎行李廷機葉向高而召王錫爵於家以爲首輔給事中胡忻以廷機之用朱賡賈主之疏詆廷機並侵賡賡尋卒忻請停其贈謚疏

不省

李三才總督漕運淮人深德之及都御史缺需次內
召而忌者日衆相繼劾之給事中胡忻等交章論救
三才亦力請罷遂自引去其後力爲東林辨白有曰
以大臣之賢者言之則葉向高去矣王象乾輩去矣
曹子汴胡忻去矣云云

洪承疇禦流賊於秦州賊遂越兩當襲破鳳縣分爲
二將會漢興窺商雒適五省總督陳奇瑜以湖廣賊
盡鼓行而西遣將扼諸要害賊見官軍肆集大懼悉

遁入興安之車廂峽諸渠魁李自成張獻忠等咸在
焉峽四山嶮立中亘四十里易入難出賊誤入其中
官軍蹙之可盡殲奇瑜不知大計許其僞降悉勞遣
歸農旣出棧道遂不可復制焉

魏闕之黨有石三畏者爲忠賢十孩兒之一爲御史
追論京察三變力詆李三才胡忻等十五人生者除
名死者追奪鍛成楊左之獄一日飲醉誤令優人演
劉瑾酗酒一劇忠賢怒削籍歸璫誅復起旋罷又有
門克新者汝陽人由青州推官擢御史諂事璫請誅

熊廷弼復陷陳仁錫文震孟等並削籍遂巡按山東
崇禎初引疾去

瑞王常浩神宗第五子天啟末之藩漢中時流寇劇
封地當賊衝王上書有曰督臣洪承疇單騎裹甲出
入萬山賊始敗遁近境稍寧旣而鳳縣再陷蜀賊入
秦州遂犯郡界幸諸將力拒賊方稍退云云亦可以
想見當時情事

廢語

漢武帝末年遣隴西任立政等至匈奴招李陵歸陵
弗歸時霍光上官傑素與陵善而立政等三人又皆
陵故人故遣之

唐高宗總章中將幸涼州時隴右虛耗議者以爲非
便高宗聞之召五品以上謂曰帝王五載一巡狩群
后四年一朝此蓋常禮朕欲暫幸涼州乃聞中外咸
謂非宜宰臣已下莫有對者詳刑大夫來公敏進曰
陛下巡幸涼州布宣王畧求之故實未虛令典但隨

時度事臣下竊有所疑高麗雖平餘寇尚梗西道經畧兵猶未停且隴右諸州人戶少寡供侍車駕備擬稍闕臣聞中外實有竊議高宗曰既有此言我止度隴存問故老蒐狩卽還

唐相止贈一代權德輿罷相爲檢校吏部尚書興元節度使自潤州改葬其父於東都亡祖之域其祖倅終右羽林軍錄事叅軍因表納檢校吏部尚書兼御史大夫請回贈祖一官詔不許納官特贈倅尚書禮部郎中

獨孤郁權相子壻也歷掌內外制有美名憲宗歎曰我女壻不如德輿孔戣爲華州刺史奏江淮進海味道路擾人并其類十數條後上不記其名問裴晉公亦不能對久之方省乃拜戣嶺南節度有異政

憲宗時權長孺知監福建院贓敗有司上其獄崔相羣救曰此德輿族子上曰德輿不合有子弟犯贓使德輿自犯朕且不赦後知其母老免死杖一百流康州

宋丞相呂端器識遠大年五十六七猶爲太常丞克

開封府判官時秦州楊平木場坊木筏沿程免稅而至京呂之親舊競托選買呂皆從而買之於是入官者多棟退材植值三司使發其事欲傾衆人無何呂獨當之認爲已買太宗赫怒俾臺司枷項送商於安置滅耳後猶簽書府中舊事怡然曰但將來但將來著枷判事自古有之

李繼隆討虜與轉運使盧之翰有隙欲陷之罪乃檄令辦芻粟期以八月出塞調發方集忽改十月適輸輓者散復檄云賊且入塞卽日進軍倉卒不可復集

遂奏轉運司乏軍興太宗大怒立遣使馳取轉運司三人首丞相呂端不敢言樞密副使錢若水請先推驗然後行誅未晚帝大怒入內若水留不去出復諫曰繼隆外戚貴重莫比今據其一幅奏書誅三轉運使雖有罪天下何由知之上意解乃先令責狀三人皆黜旣而虜欲出塞事虛繼隆坐罷招討知秦州曹武穆公在秦州有士卒十餘人叛赴虜中軍吏來告公方與客奕棊不應軍吏亟言之公怒叱之曰吾固遣之去汝再三告何耶虜聞之亟歸語其將盡殺

之

曲端字平甫鎮戎軍人知書善屬文作字奇偉長於兵畧屢戰有聲知延安府時與節制王庶有隙金犯環慶端遣吳玠拒之戰少却劾玠違節制玠因恨之張浚信讒屢黜端後與金戰僞立前軍都統制曲端旗以懼之敵知其詐浚敗而愧將叙復之玠與庶以端嘗作詩云不向關中圖事業却來江上汎扁舟浚大忌之遂下端秦州獄使獄官紿取其病狀端欣然引筆書之卽進械生之鐵籠熾火逼之殊極慘惡端

渴甚求飲與之酒九竅流血而死年四十一時建炎四年八月三日丁卯申時也陝西軍士皆流涕悵恨多叛去者浚尋得罪詔追復端官謚莊閔制曰屬委任之非人致刑誅之橫被與言及此流涕何追

陳了翁名重一時爲右司員外郎曾布欲引以附己屢薦於上了翁謂其子正彙曰吾與丞相議多不合今乃欲以官相餌吾有一書將遺之汝爲我書且曰郊恩不遠恐失汝官奈何正彙再拜願得書了翁喜明日持以見曾相於都堂適與左司朱彥會待於賓

次朱借讀其書動色布見之笑曰此書他人得之必怒布則不然雖十書不較也了翁退即錄所上書以狀申三省曰瓘不達大體觸忤大臣伏乞敷奏早行竄黜遂出知秦州書載藝文補遺 正彙後 坐罪流削坎塲不自悔云唐時文武參用宋循其制慶歷初韓范龐王四公皆換觀察使以用兵擢之也龍圖閣直學士馬季良換秦州防禦使非美遷也

曾布亦嘗知秦州其母朱氏乃徐氏外生手無中指節故西樞亦然西樞者 布官也世以其異故貴不知其氣所

傳自外氏諸徐諸徐在江南世以酒坊為業早結於藝祖問以何為異日驗徐氏曰某全家人手指不過存中節世謂徐鷄爪云

呂文靖生四子公弼公著公奭公孺皆少時文靖與夫人語四兒他日皆繫金帶但未知誰作相夫人使小鬟擎四寶器貯茶而往故跌碎之三子皆失聲獨公著凝然不動後果大拜公弼公孺皆曾官秦州

曹太尉彬天性仁恕下江南日不戮一人平居第宅每冬月不令修葺曰牆壁之間百蟲所蟄不可傷其

生其愛物如此四子璨瑋珀琮皆享豐祿瑋琮先後
歷秦州官

陳省華初爲隴城主簿後封秦國公子堯咨復知秦
州三子皆貴秦公尚無恙每賓客至其家堯佐及仲
季子侍立左右坐客踧踖不安求去公笑曰此兒子
輩爾後天下皆以秦公教子爲法時人榮之

狄武襄每入陣輒披髮戴銅面具所向無敵其始故
黥卒也既貴帝令去其面涅對曰臣以是得有今日
竟不易後受命討儂智高旣至軍斬大將陳曙以違
節制時孫沔余靖皆在坐爲之股栗

韓魏公嘗言狄青爲副帥一日宴公惟劉易先生與
焉易性素疎時優人以儒爲戲易勃然謂黥卒敢如
此罵不絕口至擲樽俎以起而青氣殊自若不少動
笑語溫然次日首造劉易謝之公於是時已知其有
量云

李師中爲布衣父坐鎮戎退陣當斬韓公馳至鎮戎
以賊衆我寡非諸將罪且欲戮其爲首一人師中父
在貸中方請於朝會師中試南宮遂上書論公墓民

正嘉州新志 卷之三
為兵往應賊大擾乞斬公以謝陝西既不行後有疑
公必執政有罪勿害師中者公笑曰彼是時以子救
父豈可加罪人聞之咸服其公恕而師中猶未之信
後擢為兩制方愧服且深謝之師中亦嘗知秦州有
政績

宋初以私市秦隴竹木獲譴者又有翰林使杜彥圭
四廂都指揮使趙延溥武德副使竇神興左領軍衛
上將軍祁廷訓駙馬都尉王承衍魏咸信
理宗時有知秦州龔欒觀史舊文非此秦州也

元順帝至正十五年徵徽州隱士鄭玉為翰林待制
不至恐或是江南之徽州謹從闕疑

別錄

渾儀

伏羲氏立渾儀測北極高下量日影短長定南北東西觀星間廣狹自伏羲甲寅年至宋大中祥符三年

庚戌歲積三千八百九十七年

宋時韓顯符傳顯符當淳化初為司天

監表請造銅渾儀至道元年渾儀成至是顯符上其法要十卷序之云云按從來言渾天無以為伏羲造儀者獨顯符云然以理推之當不誣也又溯其甲寅年蓋只在黃帝六十一年甲子前二百五十年耳其說尤近而可信是時邵子猶未生其經世紀年且本諸此矣故特表出之亦足以破千古之疑

甲歷

伏羲在位百一十年始有甲歷五運通伏羲紀陽氣之初為律法建五氣立五常定五行有甲歷五運通鑑

外紀觀此益可為立儀之一證蓋不測儀何以有歷也

重卦

伏羲德合上下天應以鳥獸文章地應以龜文圖書

乃則象作易禮緯含文嘉帝曰惟天至仁於草生月天雨

降河龍馬負圖神開我心古三墳庖羲作八卦始有筮

古文攷伏羲造八卦始作三畫以象二十四氣因而重

之爻象備矣通鑑外紀

六書

伏羲氏始畫八卦命臣飛龍氏造六書古三墳太昊作

龍書墨藪庖犧成八卦蒼頡創六文鳳羽其字韋理成

文豈但人力亦猶天授顧野王語

琴

伏羲氏斲木為琴綸絲為絃二十有七而音樂自是

興古史琴自伏羲作白虎通伏羲削桐為琴面圓法天底

平象地龍池八寸通八風鳳池四寸象四氣蔡邕論

庖犧作琴以修身理性反其真也琴操伏羲樂曰立基

樂書

瑟

伏羲氏作二十五絃之瑟通歷庖犧瑟五十絃黃帝使

素女鼓瑟哀不自勝乃破為二十五絃世本瑟潔也使

人精潔於心淳一於行今上朱襄氏使士達作五絃之

瑟呂氏春秋伏羲作瑟三十六絃蓋瑟屬陰故用十六之

數世紀

簫

伏羲氏作簫十管簫肅也其聲肅肅而清也通禮

管

女媧氏命娥陵氏制都良管以一天下之音命聖女

氏為班管合日月星辰名曰充樂既成天下無不得

理御覽帝系譜

笙

女媧氏作笙簧笙生也象物貫地而生以匏為之其

中空而受簧也世本

笛

黃帝使伶倫伐竹於昆谿作笛吹之作鳳鳴史記

正氣... 卷之三

直隸... 雜記下

黃帝時西王母獻昭華玉琯漢入關中得秦府庫所藏有笛長二尺二寸亦明昭華琯

事物紀元

律呂

黃帝作律呂以玉為管長徑尺六孔為十二音以象鳳凰之鳴其雄鳴者為律其雌鳴者為呂晉武帝時汲冢亦獲玉律尚書中候曰用玉為律東漢以玉律十二候氣先王之法也以六十律候氣蓋京房之陋

歟樂書

星歷

黃帝獲寶鼎迎日推筭晉灼曰策數也攢曰日月朔望未來而推之故曰迎日

史記

雙角

黃帝會群臣於泰山作清角之音橫吹之似兩鳳雙鳴二龍齊吟樂錄亦云蚩尤氏率魍魎與黃帝戰於涿鹿之野黃帝乃命吹角為龍吟以禦之

夔鼓

昔東海流波山有獸焉其音如雷命之為夔黃帝得之以皮作鼓擗以雷獸之骨聲聞五百里以威天下

等

等秦聲也按禮樂記等五絃筑聲今并涼二州箏形如瑟不知誰所改易也李斯書云夫擊甕叩缶彈箏搏髀而歌呼嗚嗚快耳者正秦聲也楊惲書云家本秦也能爲秦聲曹丕詩云秦箏發新聲

缶

缶形如足盆或曰形如覆盆以四杖擊之昔秦趙會於澠池秦王爲趙王擊缶卽此右四條俱出省志按黃帝制作頗多以舊有生於天水之說故因記音樂而類及之又此地固秦之始封也故彈箏吹缶亦不嫌備錄云

松雪草書

明嘉靖庚戌巡按御史劉崙登天靖山謁李杜祠鐫趙子昂草書唐詩於石爲四碑置諸祠中并誌之曰趙松雪書法蚤歲得之王右軍後有感於管夫人之言乃自成一家而風格不羣膾炙人人者亦不在右軍下然其傳盛於江之南北余入秦偶見此本守巡李君時達請付諸石余惟秦中漢唐古地也故唐以前法帖居多人習見之參之以是豈寶藏之良玉溲暑之冰甌不將使人一快觀耶因誌之以見刻者之

意

少陵石刻

國初巡憲宋公荔裳集蘭榻淳化帖晉唐以來名書
親爲鈎勒寫杜工部秦州雜詩二十章鐫之於石置
署齋中有摹榻者稱爲二絕其後道署奉裁石刻不
知散軼何處人多惜之

直隸秦州新志卷之十一雜記下終

少陵古刻

國初巡撫宋公為文未聞

親為物物於工部余

著濟中存

散孰何

有

有

有

